



**BERAMAH MESRA:** Cik Noor Irdawaty Jamarudin (*kanan*), bersama tiga anaknya (*dari kanan*) Mohd Faidhi Mohd Fazil, Mohd Faiyaz dan Mohd Faizan, menemui Dr Maliki sebelum acara Perlumbaan Selipar bermula di SMU kelmarin. Mereka disertai ibu Cik Irdawaty, Cik Relawati (*bertudung perang, belakang*). – Foto KHALID BABA

## Maliki: Kerja amal lambang Pertahanan Mutlak

► **NURUL AIN RAZALI**  
 nrzali@sph.com.sg

LEBIH 1,000 peserta menyertai perlumbaan amal unik Singapura, Perlumbaan Selipar, yang bertitik tolak di kawasan Universiti Pengurusan Singapura (SMU), Stamford Road, kelmarin.

Tidak kira bangsa, agama atau latarbelakang, mereka meredah terik mentari dengan hanya berselipar sepanjang perlumbaan amal anjuran badan tidak mencari keuntungan, Project Happy Feet, sejauh 3.6 kilometer itu.

Mereka jalan bersama-sama demi membantu anak-anak kurang berkemampuan di Singapura dan Kemboja menerusi Skim Bantuan Kewangan Sped oleh Community Chest Singapura dan This Life Cambodia.

Semangat itu mencerminkan

matlamat yang satu dan milah contoh Pertahanan Mutlak, ujar Menteri Negara (Pertahanan merangkap Pembangunan Negara), Dr Mohamad Maliki Osman.

“Usaha sebegitu mencerminkan matlamat yang sama, penyatuan dalam perlakuan dan tujuan, dan itulah Pertahanan Mutlak – semua memainkan peranan menjaga kekuatan, keselamatan dan keamanan negara.

“Kami perlukan peluang bagi warga Singapura menonjolkan sifat keprihatinan dan sokongan, demi memperkasa dan membantu mereka yang tidak berkemampuan mengatasi rintangan dalam hidup.

“Usaha membantu sedemikian memperkukuh Pertahanan Sosial,” ujar Dr Maliki, sewaktu memberi kata-kata aluan pada permulaan acara tersebut.

Perlumbaan itu juga kali pertama edisi lumba berkonsep Pertahanan Mutlak dikenalkan sejak ia dianjurkan pada 2011.

Peserta dibawa menyusuri tapak-tapak bersejarah dan berkaitan dengan Pertahanan Mutlak seperti Taman Fort Canning.

Antara peserta lumba selipar itu ialah pengurus pentadbiran, Cik Noor Irdawaty Jamarudin, 30 tahun.

Beliau berlari bersama tiga anaknya yang berumur antara lima dengan lapan tahun, serta ibu bapanya, Cik Relawati Tanjong, 50 tahun, dan Encik Jamarudin Sharbini, 53 tahun.

Di akhir acara tersebut, Projek Happy Feet telah berjaya mengumpulkan \$35,000. Mereka berharap dapat mencapai sasaran derma \$100,000 menjelang 14 April ini.